

國朝詩人徵略

國朝詩人徵略卷二

番禺張維屏子樹嶠

湯 斌

字孔伯號潛菴河南睢州人順治九年進士康熙十八年

召試博學鴻詞官至工部尙書諡文正有潛菴集

斌在

國初與陸隴其俱號醇儒隴其之學篤守程朱其攻擊陸王不遺餘力斌之學源出容城孫奇逢其根柢在姚江而能持新安金谿之平大旨主於刻勵

實行以講求實用無王學杳冥放蕩之弊故二人異趣而同歸今集中所載語錄可以見其所得力又斌雖平生講學而康熙己未

召試實以詞科入翰林故集中詩賦雜文亦皆彬彬典雅無村塾鄙俚之氣至其奏議諸篇規畫周密條析詳明尤昭昭在人耳目蓋其著述之富雖不及陸隴其而有體有用則斌尤通達於治體云

四庫提要

是集以詩存人不以人存詩故有建監功業講明理學而詩不存者文正爲

國朝第一流人而韻語葩流溫溫藹藹洵爲德人之

言因亟登之

國朝詩別裁

順治十二年公應

詔陳言請廣按先代遺書及明代死難諸君事蹟以修明
史秋以公爲潼關兵備道于是設保甲行鄉約建
義倉立社學十六年調江西嶺北道李玉廷以萬
人入雩都山爲寇公度玉廷且犯南安卽移兵爲
備玉廷至却走之復請兵分守要害扼其去路數
月玉廷就禽尋移疾歸里丁父憂服除謁夏峰孫
徵君受其學公論學首嚴義利之辨故在官無取
于屬吏又嘗論官無尊卑爲一官卽盡一職以是

行于己亦以是勉于人又嘗論學以躬行心得爲本若黨同伐異終日喧呶自以爲閑道闢邪不知其去道日遠康熙十七年

詔舉博學鴻儒魏敏果公薦公十八年

召試一等授翰林院侍講二十一年直經筵公爲講官務積誠以動

上嘗言君心正則天下治爲講官須于此處着力二十三年擢內閣學士兼禮部侍郎河南災閣臣議遣官在勘公曰使者所至苛擾實甚不如令有司自勘良便已而河南果畏勘災諱者過半六月補授江

寧巡撫至則革耗羨禁私派清漕政汰蠹役行保
甲革鹽商匣費所部蕭然蘇松向苦賦重積欠甚
多公奏免淮揚水淹地賦請緩蘇松積欠爲分年
帶征又極陳蘇松浮糧之困請量行酌減公自奉
澹泊治文書常至四鼓或勸少休慨然曰君命卽
天命也敢自暇逸乎居二年吏治日清民俗丕變
二十五年春以公爲禮部尙書公去蘇士民遮塞
衢道不得行二十六年五月不雨靈臺郎董漢臣
上書極論時事語侵執政御史陶式玉劾漢臣欺
世盜名請逮治下內閣九卿議公曰彼應

詔言事爾何罪且大臣不言小臣言之我輩當自省九月
改工部尙書十月屬有興作度材通州歸得寒疾
夜半氣逆上遂卒臨終戒子溥曰孟子言乍見孺
子皆有怵惕惻隱之心汝等當養此真心真心時
時發見久之可上達天德卒年六十一

二林
居集

道光三年奉

旨進祀

孔子廟庭

松心
日錄

上宣諭湯侍讀斌令進所著詩文且蒙

召對中有王守仁論一篇

上闕之間湯意云何湯因對以守仁致良知之說與朱子

不相刺謬且言守仁直節豐功不獨理學

上首肯曰朕意亦如此

池北偶談

左庶子湯潛菴夢登高山忽一人自後越之湯繼

之至山巔一室壁上懸麻姑仙壇記既覺不知所

謂癸亥臘月閣學缺特用右庶子王儼齋鴻甲子

二月閣學復缺湯遂繼擢上官日適某督撫疏內

有蔡姓名經者宛平王相公笑云蔡京宋奸臣胡

同其音高陽李相公曰此乃麻姑仙壇記中蔡經

耳湯聞之竦然事之前定如此同上

戊午應

召入都雷別里中親友詩云蕭然蘿薜絕雙魚雲外忽傳
有鶴書學道原因息翮早出山翻悔避名疎幽花
谷口遙相映野鷺溪邊迴自如龍尾班行真濟濟
拙庸應許住茅廬簇簇郊關擁畫輪臨河握手話
酸辛蓺花選石多同調待漏鳴珂少故人倦鳥寧
能歷遠岫歸雲何意覆通津入

朝倘得辭簪紱春水還期理釣綸

湯子遺書

陸清獻宗朱子且謂必黜陽明而後學術可一湯
文正不以爲然然文正非宗陽明也文正答清獻
書有云程朱爲吾儒之正宗欲求孔孟之道而不

由程朱猶航斷港絕潢而望至於海也又云陽明
詆毀朱子陽明之大罪過也於朱子何損今人功
業文章未能望陽明之萬一而止效其罪過何益
之有故某不敢詆斥陽明者非篤信陽明之學也
以爲欲明程朱之道者當心程朱之心學程朱之
學若曰能嫚罵者卽程朱之徒非其所敢信也觀
此則文正亦宗朱子但不欲人詆毀陽明耳

松心
目錄

摘句

年老才將盡憂多道轉親

賦就上林纔賜第表陳東掖早抽簪

按部雨餘香稻晚課農花發曉雲輕

沈 荃

字貞蕤號繹堂江南華亭人順治九年

賜進士第三人官至禮部侍郎諡文恪有充齋集

順治十八年旱

詔求直言時新例當流者徒烏喇極北荃謂烏喇距蒙古
三四千里地不毛極寒人畜凍輒死罪不至死不
應驅之死地乃獨爲一疏上之

詔令盡一荃持前議曰此議行三日不雨臣願受欺罔罪
聖祖收容納之越二日大雨盈尺例竟罷

荃汀錄

摘句

燕國文章當代擅鄭公封事兩朝多

贈

枕中不秘千秋業膝下常羅五世孫

贈孫元

程可則

字周量一字彥揆又字湟溱號石臞廣東南海人
順治九年會試第一官桂林知府有海日堂集
可則壬辰會試第一以磨勘不得與

殿試而可則益沈酣經史庚子春應

閣試授內閣撰文中書尋改內秘書院辛丑賣

詔頒賜山東己酉以戶部主事分校北闈晉員外郎督理
右翼倉務公慎稱職辛亥陞兵部職方郎中奉

命副往山西勘問總兵趙良棟白其冤癸丑出知桂林府

會檄撤藩部歸京師百務紛拏可則以敏幹稱尋

卒於任可則詩文名世與劉體仁汪琬王士正齊

名著有海日堂集遙集樓草萍花草

廣東通志

湟溱詩俊偉騰踔聲光熊熊亞於漁洋品在公敵

玉虬鈍翁諸公之右稱魯衛者惟西樵乎

國朝詩別裁

王漁洋云程君自兩漢六代三唐以來載籍之詩

罔不網羅搜討期自成一家言

粵東詩海

宋荔裳施愚山王西樵王阮亭程周量汪茗文沈

繹堂曹顧菴稱海內八家

稿李詩繫

湟溱先生五律高渾道健直逼唐賢書張伯明先

生忠烈詩卷後三首尤爲沉鬱詩云千古誰陽烈
悠悠復應城斯文慙後死吾道見先生刎豆爲軍
旅旂常足姓名至今餘浩氣日夜遶南荆盜賊悲
前代驅除豈異人將軍無衛霍博土有君臣報國
心何苦承師道更屯所欽還令子涕泣上楓宸耶
襄祠廟在江漢表遐靈潁水波同碧松門草自青
哀歌憐楚些遺恨乞秦庭異代崇風烈何由薦德
馨伯明先生諱國勳湖北黃陂人官應城司訓流
寇圍應先生率民兵死守三閱月食盡城陷先生
罵賊賊支解之司訓無守土責而先生之死忠烈

若是誦此三詩益令人想見忠魂毅魄也

聽松廬詩話

標題 奉使太原留別諸同志

古五

送施愚山遊

嵩山

古五

南池李白酒樓放歌

古七

送楊

鄂州使安南

古七

送李召林出宰信宜

古七

摘句

人烟寒大陸山雨急長河

水兼彭蠡湖山與鄂黃分

歲月他鄉迫星河獨夜浮

避風兼候關阻雨更逢兵

一官寒未補八口客誠難

銅梁舊枕秦山險玉壘新連楚塞平

排虛直上烟俱擁
數折迴看路已扁
身隨貧賤開關老
地入興亡感慨多
芳草又生新雨後
故山遙憶暮春初

范承謨

字觀公一字螺山漢軍人順治九年進士官至福建總督耿逆叛不屈被害諡忠貞有忠貞集

承謨總督福建時耿逆已蓄異志巡撫劉秉政爲賊腹心脅承謨同事承謨憤烈詆罵遂被拘繫絕食求死不得三載百折不回賊勒殺之百姓建祠

于道山之麓

大清一統志

康熙五十七年承謨子時崇以畫壁遺稿進呈
聖祖仁皇帝親製序文褒揚忠烈

宸章下賁光逮幽泉今謹敬錄冠集端用示我

國家扶植綱常風勵臣節之至意

四庫提要

范忠貞公遇害一時同死者自幕友至隸卒共五
十三人有部曲張福建者聞變手雙刃大呼奪門
當之者立斃力竭被執又秦寧許鼎者自公被執
日卽陰左右之耿逆焚公屍于山野許鼎預往潛
匿心誌其處至夜行亂石中取其燼體負骸骨至

京師事聞

上遣內大臣侍衛奠酒臨喪十九年耿精忠赴市朝日公

子時崇手刃磔其肉攫其心以祭公墓

茶筒
客話

摘句 浮雲富貴春冰薄如雪心肝鐵柱強

曹爾堪

字子顧號願菴浙江嘉善人順治九年進士官侍
講學士

曹願菴博學多識掌故所過山川阨塞無不指掌
形勢士大夫一與之遊積久不忘無貴賤俱能識
其名氏爵里家世無毫髮誤卽虞世南之稱行私
書李守素之號人物志無以過也

今世
說

君嘗受

詔與吳學士偉業等同注唐詩

學餘堂文集

摘句 對花生靜悟聽雨忘新暑

暑隨三伏盡秋入五更知

封章曾試回天手撫字無渝飲露心

十年兄弟干戈後萬里生涯瘴癘餘

失路驂驢原易困遭時鶯燕亦成媒

顧大申

字震雉號見山江南華亭人順治九年進士官陝

西洮岷道僉事有堪齋詩存

陳伯璣撰國雅集稱其樂府無遺憾七律高華可
追王李今觀其集大抵襲明七子之餘風可追王
李庶乎近之至於樂府則談何容易也

四庫提要

大申畱心經濟所著河渠論十二則圖經二十八
篇後濬婁湖吳淞江皆用其議又嘗輯毛詩楚騷
及文選詩并唐人詩著詩原五集

江蘇詩微

標題 登高邱而望遠海

七古

飲太白酒樓醉後

走筆

七古

摘句 漸看兒女大自覺宦情闌

地隨督亢依山盡河控桑乾入塞來

王士祿

字子底號西樵山東新城人順治九年進士官考
功員外郎有司勳五種集

考功員外郎王君墓碑君嘗病二十一史冗駁乖
舛三國志並列爲非謂宜廢陳氏而用謝承李漢
書倣晉書例列魏吳爲世家去宋齊梁陳魏北齊
周七書而用李延壽南北二史其宋遼金川柯維
騏宋史新編合之十二史旣正史體復省煩複擬
上書不果又謂坊本子貢詩傳申公詩說並僞書
李維正序行津逮秘書收之皆誤也

學餘堂
文集

癸卯典河南試故事有司繩尺取熟穩不敢涉古
文一字謂之中式君獨摘簡一變其卑弱人或惡
之撫拾下吏具三木賴叔弟士祐殫力橐籥得不
坐竟免官

同上

磨勘獄解扁舟南下阮亭時爲維揚司李相見持
之泣西樵都及患難事直取一巨編置前曰弟

視吾詩較前差進否

國朝名家小傳

先考功西樵於癸丑七月廿二日以哭先淑人不
起屬纊時口鼻中作梅檀蓮華蘭蕙種種異香凡

三日夜

池北偶談

西樵詩集屢芟後止刻四卷佳句佚者頗多如

濰縣道中云人煙通下密橋路遶東丹感興云大

人有賦言仙意內景何方駐聖胎此類尙夥

香祖筆記

標題

寄季弟貽上

古五

晨發獲鹿暮抵井陘

古五

焦山古鼎歌

古七

吳道子水陸畫軸歌

古七

飛龍宮行

古七

摘句

澹池不可名綠淨如欲無

雄風涼大壑雌霓貫秋城

炊烟低近屋雜樹濕黏雲

言聽便爲天下福計違不負一生心

賡張簾山

獨懷太史名山志別撰河圖括地篇五嶽

攜筇雙屐外千秋抵掌一樽前

贈顧亭林

張永祺

字爾成順天大興人順治九年

賜進士第二人

先生督豫漕蠲弊剔蠹公餘以風雅振作鄴中

百家

詩小引

攜句 閱歷成吾老艱難見物情

聽雨頭新白看山眼舊青

興來忘地主醉後飲天和

李來泰

字石臺江西臨川人順治九年進士康熙十八年
召試博學鴻詞官翰林院侍講有石臺集

制藝才藻富豔詩古文則不逮也

四庫提要

順治十二年來泰督學江南所拔皆孤寒知名士
尋任蘇松糧儲道復分守蘇松常道歷官清慎能

持大體

大清一統志

摘句 到江芳草盡出郭遠山齊

溪聲時作雨雲態欲移山

洛蜀黨成疑誤國熙豐法做竟緣公荆公攸

金漸皋

字夢蜚浙江仁和人順治九年進士官漢陽知縣
有怡安堂集

怡安勝任劇邑大吏方以才能薦而翩然乞身其

風高矣

國朝詩別裁

摘句 元亮晚途甘石隱孔明早歲本龍蟠

二分明月仍今夕十里珠簾異昔時

丁思孔

字景行漢軍人順治九年進士官至雲貴總督

思孔巡撫湖南時逆藩始平拊循凋瘵振興文教

疏請頒國子監校刊經史置岳麓書院政暇集諸

生講論至今書院有丁公講堂

大清一統志

摘句 樵風吹綠野花氣暖春山

首重光

字在辛號江上江南句容人順治九年進士官監
察御史江西巡按

江上風骨稜稜雖權貴亦憚之工書畫其詩清剛

雋上如其人

京江書集

海寇犯京口侍御與張九微守禦有功桑梓事平

敕賜功宣屏翰扁額卒祀鄉賢

江南通志

摘句 百年容易過萬事總難工

人家依岸轉河水抱城流

雨入千山暝雲生五月涼

千峰遠抱金陵氣萬井低浮鐵甕烟

胡文學

字道南浙江鄞縣人順治九年進士官太僕少卿
有敬義堂集

公官真定推官巨盜高鼎出沒并代間二十年公
請無用兵以恩撫之鼎率衆降巡視兩淮鹽政建

安定書院李鄴嗣輯耆舊集爲開雕焉

兩浙輶軒錄

摘句 清樽方滿嘉客至好月欲上名花開

黎士宏

字媿曾福建長汀人順治十一年舉人官寧夏副使道有託素齋集

媿曾少遊李元仲之門稱入室弟子補永新令歷官至甘山道移節寧夏適邊將倡亂訛言數起獨以鎮靜處之督餉籌邊治軍書每至達且八年塞上勞苦功高追干羽舞階膚功克奏諸公多以節鉞相推而屢疏陳情卒遂初服一畝之宮彈琴賦詩幾忘當日赤羽白旗而以身爲長城之寄也者

昔臧文仲有言賢者急病而讓夷若此者可不謂

加於人一等歟

國朝名
家小傳

周櫟園有閩茶曲媿曾作閩酒曲

榕城
詩話

媿曾有至南昌知周櫟園先生無恙且得手書七

律云他鄉驚喜君還在痛定開函淚更流萬死才

回明主願孤兒猶屬故人收衆中薄命誰能惜意

外微生荷獨畱誤盡閩南碑下客無端北望哭西

州沉摯而飛動七律中上乘也

聽松廬
詩話

摘句 士女行春多結伴仙人浪跡總浮家

水仙
花

梅一清

字潤公號瞿山江南宣城人順治十一年舉人有

天延閣集

瞿山畫山水入妙品畫松入神品輯梅氏詩略十

一卷

居易錄

梅瞿山有一峰青到水句梅杓司有牛飯就松涼

句俱佳

聽松廬詩話

摘句 梅市逢人仙是吏烏程作縣酒爲名

國朝詩人徵略卷二

國朝詩人徵略卷三

番禺張維屏子樹輯

顧炎武

一名絳字寧人號亭林江南崑山人有亭林集

日知錄顧炎武撰炎武學有本原博瞻而能通貫
每一事必詳其始末參以證佐而後筆之於書故

引據浩繁而牴牾者少

四庫提要

先生於書無所不窺尤畱心經世之學歷覽廿一
史天下圖經文編說部以至公移邸抄之類有關
於民生利害者隨錄之曰天下郡國利病書周流

西北二十年別有一編曰肇域志探原竟委言可見之施行最精韻學有音學五書喜金石之文到處卽蒐訪有金石文字記晚益篤志六經謂經學卽理學舍經學則其所謂理學者禪學也而日知錄尤爲先生精詣之書凡經史之粹言具在焉顧氏有三世僕曰陸恩叛投里豪欲告先生通海先生亟往禽之數其罪沉之水僕婿復投里豪以千金賄太守求殺先生獄日急曲周路舍人溥者故相文貞公振飛子也識兵備使者爲愬之始得移訊松江而事解又萊之黃氏有奴告其主者多株

連以吳陳濟生所輯忠義錄指爲先生作首之先生赴山東自請勘訟繫半年富平李因篤爲告急於有力者解之獄始白自是往還河北卜居陝之華陰置五十畝田供晨夕餌沙苑蒺藜而甘之曰啖此久不肉不茗可也凡先生之遊以二馬二騾載書自隨所至阨塞卽呼老兵退卒詢其曲折或與平日所聞不合則卽坊肆中發書而對勘之華下諸生請講學謝之曰近來講學之師專以聚徒立幟爲心李二曲亦徒以講學得名然名之爲累甚矣先生旣負用世之略所至每小試之墾田度

地累致千金故隨寓卽饒足徐尙書乾學甥也累書迎先生南歸不至卒於華陰年六十九無子門人奉喪歸葬崑山高弟吳江潘耒收其遺書序而

行之

結埼亭集

亭林先生至都徐學士設讌三醕卽起學士曰舅氏幸暢飲夜闌張燈送回何如先生曰世間惟淫奔納賄于夜行之豈有正人君子而夜行者乎臆

崇正己卯秋闈被擯退而讀書感四國之多虞耻經生之寡術于是歷覽二十一史以及天下郡縣志書一代名公文集間及章奏文冊之類有得卽

錄共成四十餘帙一爲輿地之記一爲利病之書

天下郡國
利病書

此肇域志稿本未成之書其志願所規畫者甚大
而方輿紀要實已括之亭林生長離亂奔走戎馬
閱書數萬卷手不輟錄觀此帙密行細書無一筆
率略始歎古人精力過人志趣遠大世之習科條
而無學術守章句而無經世之具者皆未足與於

此也

琴經
室集

國初名儒余最服膺顧亭林先生之學博矣而
無考据家傅會穿鑿蔓引瑣碎之病先生之行脩

矣而無講學家分門別戶黨同伐異之習先生之
才識優矣而無從橫家矜才逞智劍拔弩張之態
所著日知錄一書舉經史子集之要統修齊治平
之全擇精語詳扶世翼教其學爲有用之學其言
皆有本之言孔子所謂博學於文約之以禮孟子
所謂守先王之道以待後之學者若先生者庶乎
足以當之矣

松心
日錄

天下郡國利病書卷帙繁重校勘未詳其中誤字
不少余嘗欲取方輿紀要與此書互勘而撮二書
之要合爲一編刻巾箱本以便行篋

松軒
隨筆

亭林集嵩山詩本八韻蓋竹垞刪爲五律而別裁
因之石開重出啓重改會蓋亦竹垞所訂

詩聽松廬話

亭林先生詩多沉雄悲壯之作偶記一律云長看
白日下蕪城又見孤槎海上橫感慨河山追失計
艱難戎馬發深情崩車斷簇周千畝蔓草枯楊漢
二京今日大梁非舊國夷門愁殺老侯嬴真氣噴
溢於字句間蓋得杜之神而非襲其貌者所可比

也

同上

標題

古隱士

古五

述古

古五

德州講易

古五

天

津

古五

秀州

古五

王官谷

古五

勞山歌

古七

楠句

禮同虞帝陟神契鼎湖升

禹陵

天地存肝膽江山閱鬢華

馬跡未能追穆后虎頭空自相班生

世事粗諳身已老古音方奏客誰聽

哲士有懷多述酒英流無事且明農

一中年早已傷哀樂死日方能定是非

黃宗羲

字太冲號梨洲浙江餘姚人諸生有南雷詩歷

易學象數論六卷黃宗羲撰宗羲究心象數一一

能洞曉其始末易學象數論與胡渭易圖明辨均

可謂有功易道

四庫提要

明文海四百八十二卷黃宗羲撰宗羲所關明人集幾至二千餘家如桑悅北都南都二賦朱彝尊著日下舊聞時搜討未見宗羲得之以冠茲選其他散失零落賴此以傳者復不少亦可謂一代文章之淵藪矣

同上

宗羲爲明御史尊素之子尊素天啓時以抗疏劾客魏死詔獄後忠賢伏誅宗羲冒死報仇袖鐵椎擊逆黨許顯仁于刑部堂又擊殺獄卒顏咨某仲文時以忠義孤兒宥之

浙江通志

順治丙申後海氛漸滅公奉太夫人返里門於是始畢力於著述公自謂受業蕺山時所得尙淺患難之後始多深造又謂明人講學襲語錄之糟粕不以六經爲根柢束書而從事於遊談故受業者必先窮經兼令讀史又謂讀書不多無以證斯理之變化多而不求於心則爲俗學故凡受公教者不墮講學之流弊公以濂洛之統綜會諸家橫渠之禮教康節之數學東萊之文獻艮齋止齋之經制水心之文章莫不旁推交通連珠合璧自來儒林所未有也康熙戊午

詔徵博學鴻儒又聘修明史公以母既耄年已亦老病爲辭公雖不赴徵而史局必咨於公宋史別立道學傳爲元儒之陋明史不當仍其例時朱檢討彝尊方有此議湯公斌出公書以示衆遂去之地志亦多取公今水經爲考證公又言勾股之術乃周公商高之遺而後人失之使西人得以竊其傳公著有授時歷故測圖要義其後梅徵君文鼎本周髀言歷世驚以爲不傳之秘不知公實開之公論文謂唐以前句短唐以後句長唐以前字華唐以後字質唐以前如高山深谷唐以後如平原曠野故

自唐以後爲一大變然而文之美惡不與焉其所
變者詞而已其所不可變者雖千古如一日也此
足以掃近人規撫字句之陋公之文不名一家著
有南雷文定南雷文約明儒學案明夷待訪錄諸
書公自營生壙於忠端墓旁乙亥之秋瘵疾數日
而歿得年八十有六

鮎埼亭集

黎洲先生孝義著於前朝經史冠乎

昭代詩其餘事耳不寐作云年少雞鳴方就枕老人
枕上待雞鳴轉頭三十餘年事不道消磨只數聲

語極曠達

定香亭筆談

自宋史別立道學傳而元明以來遂有專以講學
爲儒者抑思聖賢之道載於四書六經本如日月
江河布帛菽粟久經宋儒闡發義理益明學者但
患不能行不患不能講行卽粗而非易講雖精而
不難若第空談心性摹倣語錄守方隅之見襲陳
因之言遂自命爲道學中人恐聖賢開物成務之
道明體達用之學不如是之易也亦不如是之隘
也善夫顧亭林先生之言曰君子博學於文自身
至於家國天下制之爲度數發之爲音容莫非文
也孔子教人文行忠信而性與天道在其中矣黃

梨洲先生之言曰經術所以經世方不爲迂儒之學旨哉言乎兩先生不必居道學之名其斯爲有道學之實者乎

松心日錄

梨洲先生書壁絕句云倦鉤簾幙晝沉沉難向庸醫話病深不信詩人容易瘦一春花鳥總關心先生孝義肫摯經術湛深而詩情乃爾婉麗所謂老

樹著花也

聽松廬詩話

摘句 絕壁飛泉多奪路好山明月亦尋人

兩管東西分梗葉一燈兒女共團圓

製茶

五更醒夢香封屋千里懷人月在峰

梅花

甄宗炎

字晦木號立谿浙江餘姚人貢生有二晦山樓譜
集

宗炎力闢陳搏之學謂周易未經秦火不應獨禁
其圖轉爲道家藏匿二千年至陳搏而始出謂陳
搏之圖書乃道家養生之術與元陳應潤之說合
謂周子太極圖說圖雜以仙真說冒以易道亦與
朱彝尊毛奇齡所考略同

四庫提要

先生兄弟於象緯律呂壬遁之學皆有密授生平
作詩大似誠齋門人有問學者曰諸君但收拾聰

明歸之有用一路足矣

歸琦亭集

先生晚年賣畫浙西時傳黃高士畫爭購之

姚江詩存

摘句 不呈面目真高士閒過春秋勝地仙

魏際瑞

字善伯號東房江西寧都人貢生有魏伯子集

伯子名祥補弟子員改名際瑞與弟禧等奉父母

居翠微山韓大任竄贛當事議招撫大任言非魏

伯子吾不信也當事以屬伯伯慨然行至江西兵

遽從東路逼大任營大任疑伯賣己又有奸人牽

率大任降閩軍大任拔營走伯遂遇害

魏叔子文作

范公承謨撫浙蠲荒賑飢諸大事所全活百萬作

左右宣力爲多

同上

摘句 宅老疑多怪官清若有神

三分天下四川地六出祁山五丈原

窮愁久愧牛衣婦兵法終慙馬服君

杜陵得失心千古李白飄零酒一杯

魏禧

字凝叔號裕齋一號勺庭江西寧都人諸生有魏

叔子集

魏禧嘗集同志九人講學于易堂

四庫提要

先生形幹修頤目光奕奕十一歲補邑弟子冠其
曹甲申後棄諸生專古學教授弟子數百人方寇
初熾先生尋山石結砦以衛家室經營措注皆有
成法邑人倣效之得免寇攘之難時年二十一也
先生與兄弟如一身而植善規過交相切劘若嚴
師友凡朋友有過法言異語靳其改而後卽安已
有闕失朋友兄弟交攻之無少忤其于文章一字
未安不憚十反旣登木者卽行剝易嘗出遊思廣
接天下人物東南君子無不徧交之庚申十一月
舟至儀徵忽發心氣病一夕卒年五十七所著有

文集詩集目錄左傳經世皆行于世

魏季子文集

余昔參藩嶺北寧都有魏冰叔兄弟余知之未暇
入山一訪今讀其所著書想見其爲人收仲更從
冰叔益求知所未知焉還

朝以此爲使歸之獻則所以報國者深矣

湯子遺書

勺庭無子嘗曰吾有三子左傳經世長子也目錄
次子也文集三子也經世固佳然愚以文集長子
也目錄次子也經世三子也

國朝二十四家文鈔

冰叔先生尤深於史舉數千年治亂興衰得失消
長之故窮究而貫通之而又驗之人情參之物理

本胸中所積而發之於文故其勢一往而不可禦
其行文之妙蓋得力於史記老蘇者居多聽松廬
文鈔
余嘗欲輯顧亭林魏叔子魏環溪湯潛菴陸稼書
五先生之語有益於後學者合爲一編名曰

國朝五子精言

松軒
隨筆

著書萬卷我無一字叔子集中筆銘也大造不言
所利大臣不居成功絕大道理不意於寸管見之

聽松廬

詩話

魏叔子詩蒼古質樸然亦有風致絕佳者春日絕
句云棕鞋藤杖笋皮冠落日春風生暮寒竹外桃

花花外柳一池新水浸關干

同上

摘句

周庭多雜木深冬如春榮瑣細不相識但

知天所生物各抱真性豈希松柏名

德公處襄陽諸葛僑隆中旣當都會地亦

多豪傑從但使處孤僻時務安得通

九曲山藏寺萬株松到門

酒醇能自醉意適便爲鄉

一燈影落庭如水四壁蟲鳴夏欲霜

兩岍蓼花紅有淚一江秋水澹無聲

魏禮

字和公江西寧都人諸生有魏季子集

季剛直急然諾喜任難事好倜儻立節又刻苦讀書工古文詩名日起足跡幾遍天下所至必交其賢豪天下士亦往往願見與交吾兄弟三人如一身自幼至老如一日憶戊寅徵君析產持一田券

躊躇謂母曰以與祥則禮損與禮則祥損季時九

歲適過案旁應聲曰寧損我母以損伯兄

魏叔子文集

魏季子句云車輪碾白日客路接青天麩餅頻餐慣風沙一路添北道風景宛然在目又花陰零碎

月五字幽雋雨脚壓天低五字狀景亦真

聽松廬詩話

摘句 不作富家衣寧作貧家裳貧賤能相守富

貴能相忘

饑鷹飛覓鳥渴馬立聽泉

野曠前村遠風高落葉遲

輕舟難壓浪急雨欲穿篷

園林消壯志衣食誤平生

高秋夜靜人如鶴清露風微草是烟

海上燕猶知氣候客中人又遇清明

傅山

字青主一字齋廬山西陽曲人有霜紅龕集

青主一字公之他太原人六歲啖黃精不樂穀食

強之乃復食讀經史如夙通者

池北偶談

以七十四歲老病將死之人謬充博學之薦而地方官府卽時起解籃輿就道累經部驗今幸放免復臥板舁歸從此以後活一月不可知一年不可

知先生聞之定當大笑

霜紅龕集

督學袁公繼咸爲巡按張孫振所誣孫振故奄黨也先生約同學曹公良直等詣甌使三上書訟之不得達乃伏闕陳情時撫軍吳公姓亦直袁竟得雪馬文忠公世奇爲作義士傳比之裴瑜魏劭先

生以連染遭刑抗詞不屈絕粒九日幾死門人救
之得免以黃冠自放工書兼工畫家傳有禁方乃
資以自活其子曰眉能養志先生喜苦酒自稱老
藥禪眉稱小藥禪或出遊眉與子共輓車暮宿逆
旅仍篝燈課讀經史騷選諸書康熙戊午

詔舉博學鴻儒先生稱疾固辭有司令役夫舁其牀以行
既至京師益都馮公密請以先生與杜紫峰雖未
豫試然人望也於是

特加中書舍人以寵之先生嘗走平定山中爲人視疾失
足墮崩崖僕夫哭曰死矣先生秀皇四顧見有風

峪甚深中通天光一百二十六石柱林立則高齊
所書佛經也摩挲視之終日而出欣然忘食其嗜

奇如此

鮪亭集

摘句 馬駑人不奇芻豆日在阜馬良人過求飛

馳嘗不飽

形因詩裏瘦意不利中忙

蒼松翠竹爲三友明月清風作四鄰

梅花集古

申涵光

字和孟一字符孟號冕盟一號聰山直隸永年人

貢生有聰山集

是編附荆園小語荆園進語皆所作語錄四庫提要

涵光與殷岳張蓋稱畿南三才子

畿輔通志

涵光父節愍公盡節後以理學訓其兩弟皆能立

身揚名今世說

申和孟以詩名河朔間故人自京師寄書申報以

詩云日日秋陰命筍輿故人天上落雙魚荷花未

老新醪熟爲道無閒作報書其簡傲如此地北偶談

鳧盟有屐響住鳴蟲五字體物入細聽松廬詩話

摘句 數椽風雨外萬事死生餘

人有漁樵皆素侶地無烽火卽丹邱

錢澄之

原名秉鐙字飲光江南桐城人有藏山閣橐田間集

澄之家世學易又嘗問易於黃道周

四庫提要

昔賢評陶元亮詩云心存忠義地處閑逸情真景

真事真意真田間一集庶幾近之

靜志居詩話

摘句 在世雖百年畢竟舍之去臨去豈不戀戀

亦不得住

吾身聽物化化及事則休當其未化時焉

能棄所謀

梅文鼎

字定九江南宣城人有績學堂集

文鼎篤志嗜古尤精歷算之學康熙四十一年大
學士李光地以其歷學疑問進呈會

聖祖仁皇帝南巡於德州

召見

御書績學參微四字賜之以年老遣歸嗣

詔修樂律歷算書徵其孫穀成人侍書成復驛致

命校勘後年九十餘終於家

特命織造曹頌爲經紀其喪至今傳爲稽古之至榮其所

論著皆足以通中西之旨而折今古之中自郭守
敬以來罕見其比

四庫
提要

遠國能言歷術者多在西域亦有故堯典命羲仲
宅嵎夷卽今登萊海隅之地也義叔宅南交則交
趾國也此東南皆濱大海故以爲限和叔宅朔方
今口外朔方地也地極冷不可更北故以爲限獨
和仲宅西但言西而不限以地者其地旣無大海
之阻又氣候略同內地無極北嚴凝之畏唐虞聲
教四訖和仲旣奉帝命測驗可以西則更西遠人
慕德景從或有得其一言之指授一事之畱傳引

有以開其知覺之路而彼中穎出之人從而擬議
之以成其變化固宜有之

梅氏叢書

明萬歷中西洋人利瑪竇始入中國利瑪竇兼通
中西之文其所著書實有功於歷學其國奉耶穌
爲天主利瑪竇旣以歷法授徐光啓李之藻諸人
遂并欲人從其說而其徒陽瑪諾王豐肅等盛稱
天主以歆動愚民誘人傳習其居心殊爲詭譎而
當時受其誑惑者竟不下萬人其意皆因測天有
驗遂敢挾其術以自高不知西法實中法所流傳
至是而復還於中國非至是而始行於中國也今

略舉數端證之太史公言幽厲之時疇人子弟散
入殊方一也西洋歷所言寒煖五帶之說與周髀
七衡合而周髀算經漢趙君卿已爲之註二也立
天元一法利瑪竇不得其解而宋秦九韶元李冶
皆能言之三也利瑪竇撰經天該其星名與中國
同而丹元子步天歌隋時已著四也西法言各省
節氣不同卽中國里差之法是里差之法實爲西
法所自出五也西洋有借根法名阿爾熱巴拉阿
爾熱巴拉者華言東來法也是尤爲中國流傳至
西之明證六也且用西法者第取其測算之精而

已至紀日于午何如紀于子之善也紀月于望何如紀于朔之善也是西法有不及中法者而中法固在西法之前者也我

朝

聖

聖相承先後同揆

御定歷象考成

御定儀象考成研究理數酌古準今集中西之大同建天

地而不悖而梅

文鼎王錫闢

胡

直游

薛

鳳祚

江

永

諸臣於天文歷算之學皆能覃思精究洞悉源

流愈推愈密使利瑪竇陽瑪諾輩生於今日亦第
循循然列監臣之班備疇人之學又曷敢逞其管
蠡之私智也哉

聽松廬文集

摘句 運會漸開通經緯自昭朗積候承古初妙
義本微茫所愧疎見聞觀察局益益庶幾
賢博奕敢謂窺參兩

胡渭

字拙明號東樵浙江德清人廩生有東樵遺詩

渭生平著述甚夥而禹貢雖指一書尤精力所專
注康熙乙酉恭逢

聖祖仁皇帝南巡會呈

御覽蒙

賜昔年篤學扁額積古之榮至今傳述

四庫
提要

摘句 天上坐來凌倒景鏡中行處信春風

萬斯同

字季野浙江鄞縣人有石園集

明以來談道統者揚已陵人互相排軋卒釀門戶
之禍斯同目擊其弊著儒林宗派十六卷凡漢後
唐前傳經之儒一一具列除排擠之私以消朋黨

其持論獨爲平允

四庫
提要

先生爲戶部郎泰第八子少不馴閉之空室中先生竊視架上有明史料數十冊讀之甚喜又見有經學諸書盡讀之旣出伯兄出經義目試之千言俄頃而就伯兄大驚以告戶部戶部曰幾失吾子是日始爲先生新衣履送入塾

鮎埼亭集

康熙己未開局修明史徐學士元文延先生往先生請以布衣參史局不署銜不受俸總裁許之諸纂修官以稿至先生閱畢謂侍者曰取某書某卷某葉有某事當補入取某書某卷某葉有某事當參校侍者如言至無爽者明史稿五百卷皆先生

手定李安溪曰吾生平所見不過數子願亭林
季野閣百詩斯真足以備石渠顧問之選者也
摘句 陶令常乞食顏公亦求米古來賢達人所
遇猶若此况我與時違凍餒固其理且當
守故居量力營菽水

陳允衡

字伯璣江西南城人有澄懷閣愛琴館諸集

允衡選國雅白魏齋介以下凡五十餘家
提要 四庫

伯璣結屋南州之蘇公亭畔詠歌自適
江西詩徵

摘句 所欣人迹稀與古相周旋

隱知生理切，亂覺史書真。

月憐將去客，花憶欲歸人。

食力古人如可見，洗心塵市亦堪居。

陶 窳

字苦子，廣東番禺人，諸生。

陶氏世襲錦衣，苦子刻苦如寒素。

國朝詩別裁

窳初名璜，字握山，詩海作兩人，編校偶誤也。

松軒隨筆

摘句 有形隨自應，無相本來空。

鏡

忠臣淚帶寒潮長，楚客悲逢落葉多。

入水苦匏思共濟，望秋蒲柳感先零。

朱鶴齡

字長孺號愚菴江南吳江人諸生有愚菴集

鶴齡研思經義其邨廡衛三國禹貢三江震澤太

湖岍冢漢源諸辨多有裨於考證嘗箋註杜甫李

商隱詩集故所作韻語頗出人二家之間四庫提要

松陵文獻稱其遺落世事晨夕一編行不識路塗

坐不知寒暑或謂之愚因以愚菴自號靜志居詩話

摘句 薇蕨苟可采何必在首陽清流苟可汎何

必在滄浪

安致遠

字靜子號拙石山東壽光人貢生有紀城詩草

自順治乙酉至康熙甲子十五舉不售卒偃蹇以

沒自序謂詩喜摩詰文摹廬陵

四庫提要

摘句 重逢非昔貌小語立斜陽

人傳燕趙悲歌地水咽荆高變徵聲

馮班

字定遠號鈍吟江南常熟人有馮定遠集

班論事多達物情論文皆究古法

四庫提要

其說力排嚴羽尤不取江西宗派然所作惜思有

餘而風格未高

上

趙秋谷於近代文章家多所訾督獨折服馮定遠

一見鈍吟雜錄卽歎爲至論至具朝服下拜嘗謁

定遠墓以私淑門人刺焚于冢前

柳南
隨筆

定遠臨桂伯墓下絕句云馬鬣悠悠宿草新賢人

聞道作明神昭君恨氣萋宏血帶露和煙又一春

蒼涼之意出以絳麗之詞是謂才人之筆

聽松廬
詩話

摘句 燕去漫爲朱戶客鵲飛應識絳河人

千樹穠華千樹雨一番晴暖一番風

如畫仙山不能住始知劉阮是粗才

不知一夜前邨雨多少春泥上燕巢

王翊

字介人浙江嘉興人有二槐草存

天崇之間詩歸盛行入沿竟陵流派翊毅然獨尙

唐音

提要 四庫

君謁陳臥子君詩有前路夕陽外行人春草中句

臥子擊節曰此今之高三十五也

靜志居詩話

秋槐老人家故業染一手挾書一手數錢與布販

菜傭相應答好製詞曲作紈扇記忌者誣以詆毀

里紳訟之官家計日落然詩日益有名

鶴里詩繫

摘句 江山雄白下人物近黃初

夜月旌旗五馬渡秋風草木八公山

西蜀喻通司馬檄中山謗滿樂羊書

劉醇驥

字千里號廓菴湖北廣濟人貢生有芝在堂集

醇驥謂學王李未至襲風格備鏗鏘猶俟諸三餘
儉儒苦古帙浩繁便援公安竟陵而以其竅鳴也

觀其所論可知其所宗法矣

四庫
提要

千里生有文在手曰歷性方直以歲貢入京與環
溪魏公講業極懽或勸仕爲有司千里曰吾固不

任是遂歸著有學庸古本解諸書

廣濟
縣志

摘句 兩雪看蓬鬢詩書慰杖藜

承平不用長沙哭慷慨還須杜牧談

張仁熙

字長人號藕灣湖北廣濟人諸生有藕灣集

仁熙論詩謂時弊雖深慎勿相救公安救歷下至

於佻竟陵救公安陷於辱

四庫提要

宋公牧仲通守黃州于雪堂築東齋延先生言詩

垂老猶進曾元孫授六經大義年八十四名

廣濟縣志

摘句 雲知高士宅月到苦吟時

燕市黃金酬駿馬楚人白雪薄吟詩

費密

字此度四川成都人有鹿峰集燕峰集

王士正盛稱其詩其文不涉王李之摹擬亦不涉

袁鍾之纖仄奇矯自喜頗有可觀

四庫提要

密跋一足後往蘇門謁孫鍾元先生稱弟子

池北偶談

摘句 大江流漢水孤艇接殘春

雞豚散在野兒女聚觀人

彭師度

字古晉號省廬江南華亭人諸生有省廬集

吳下爲千英之會集於虎邱師度年十五卽席成

虎邱夜宴同人序吳偉業有江左三鳳凰之目蓋

謂師度及吳兆騫陳維崧也

四庫提要

摘句 漢家相業多由吏宋室文人半乞州

冷士媚

字又媚號秋江江南丹徒人諸生有江冷閣集

士媚詩刻意學杜多爲激壯之音晚年節饗飧之

費自梓是集

四庫提要

士媚以圖書詩史自娛終身不入城府大學士張

文貞公歸里省親嘗訪之及還

朝招之不往

丹徒縣志

摘句 風霜辭故國冰雪渡黃河

樹外秋陰生大陸天邊落日見中原

黃虞稷

字僉邵福建晉江人

千頃堂書目黃虞稷撰所錄皆明一代之書考明

一代著作者以是書爲可據

四庫提要

馬瑤草士英罷鳳督時肆力爲畫黃僉邵題一絕

云半閒亭上草離離尙有遺蹤寄墨池猶勝當年

林甫輩弄麀貽笑誤書時

聽松廬詩話

摘句 藜杖尋詩荒徑外松風坐客小樓頭

最是夜深淒絕處薄寒吹動茜紅衫

潘天成

字錫疇號鐵廬江南溧陽人諸生有鐵廬集

天成幼與父母遊讐相失年十五乞食行求遇於江西界百計迎歸傭販以養備極艱苦以其閒讀

書講業竟爲積學

提要四庫

潘鐵廬師湯世調世調自言夢見孔子拊其背而呼之未卒之先夢周公約其同行此與吳康齋自記夢孔子來訪皆未免明代講學家自詡自高之習轉不如鐵廬孝行篤實爲可重也

松心
川錄

摘句 路遙尋訪心無異年少從游鬢已斑

此二句鐵廬哭梅勿菴詩也鐵廬弱歲尋親流離困苦猶從勿菴受天文歷算之學可謂力學篤行之士矣

陳啓源

字長發江南吳江人

毛詩稽古編陳啓源撰自記謂閱十有四載凡三易彙乃定引據賅博疏正詳明一一皆有本之談

提要 四庫

本朝爲毛詩之學者當以稽古編爲最惟生平信佛至謂西方美人爲指佛而言是則能治經而不能

解惑矣明末徐光啓諸人方崇信利瑪竇長發幼

時或習聞西論遂漸染而沉溺與

松心日錄

摘句 天上霓裳傳此夜宮中玉樹憶當年